

Date – 09/07/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Chief Minister Pu Lalduhoma’n Police hna chu harsatna tawk tanpui ani a ti a, mi hlimna aiin manganna hriat tam zawk thin anih avangin rawngbawlna anga ngaih a pawimawh thu a sawi.
- 2. Tunhnai ni 3 chhunga ruahsur chuan Mizoram hmun hrang hrangah chhiatna a thlen a, hmun thenkhatah in chim awmin tui lian avanga chenna in chhuahsan an awm a, inkalpawhna kawng ping a awm nual bawk.
- 3. Ram pathum tlawh tura zin chhuak Prime Minister Narendra Modia chuan hlawhtling taka Indonesia a tlawh hnuin nizan khan Australia khawpui Melbourne a thleng.
- 4. External Affairs Minister Dr.S.Jaishankar chaun nimin khan Kuwait ram hruaitu Crown Prince Sheikh Sabah Al-Khaled Al-Sabah a kawm.

<><><>

CM

Chief Minister Pu Lalduhoma’n Police hna chu harsatna tawk tanpui ani a ti a, mi hlimna aiin manganna hriat tam zawk thin anih avangin rawngbawlna anga ngaih a pawimawh thu a sawi.

Nimin khan Chief Minister hian a pisa ah Mizoram Police Service Officer, Administrative Training Institute-a training mek (MPS 26th Batch Trainee) mi pariatte a kawm a, MPS Training mekte chu thiamna sang tak tak nei an nih avangin an tangkai hle dawn tih a hrilh a. Zirna tluang pangaia thiamna bakah Hindi tawng thiam a pawimawh tih sawiin Information Technology lamah pawh hmasawn zel a tul thu a sawi a ni.

Chief Minister chuan Police hna chu harsatna tawkte tanpui hna a ni ber tih sawiin mi hlimna leh hlawhtlinna chanchin aiin an manganna chanchin an hre tam zawk thin a ti a, Police hna chu rawngbawlna anga ngaia thawh chi hna pawimawh tak a ni a ti bawk.

<><><>

VB-G RAM G

RD Minister Prof Lalnilawma’n kum 2047-a India in ram hmasawn nih a tumna kal zelah VB-G RAMG kaltlangin mipuiten mawhphurhna an nei tih a sawi.

Nimin khan Mizoram sawrkar hnuai RD&AD buatsaihin VB-G RAM G hawna hun Vanapa Hall-ah buatsaih a ni a, Prof Lalnilawma chuan India in ram hmasawn nih a tumna kawngah VB G RAM G chu a pawimawh hle a ti a, mitin intodelhna leh dinhmun harsa zawk te khaichhuahna tur anih avangin sawrkarin a ngaih pawimawh thu a sawi a ni.

Minister chuan State sawrkarin VB-G RAM G a tum ve tur cheng vaibelchhe 128 chu CM leh finance lamin an ngaih pawimawh avangin sum lamah harsatna a awm dawn loh thu a sawi a, a hlawhtlunna chu mipui te, VC te, official te thawhhonaah a innghah tur thu a sawi.

Minister chuan VB-G RAM G scheme-in a ngaihpawimawh pakhat chu Tui hnianghnar taka neih a ni a ti a. PHE nen tangkawpin tuikhuah rintlak tak siam an tum thu a sawi a, India leh Israel sawrkar tangkawpin Mizoramah tui hnianghnar taka a awm zel theih nan hmalakna kalpui mek a nih thu a sawi bawk.

He scheme thar hnuai hian ni 125 inhlawhna hi mipuite eizawna nen inkungkaih tlat niin department dangte nen tangkawpin changtlung zawk eizawna duang tura hmalakna kalpui mek a nih thu a sawi bawk.



AGRICULTURE MINISTER

Agriculture Minister Pu P.C. Vanlalruata’n hmasawna tluantling a awm theih nan hmun hrang hranga scheme kalpui dan enfiah a pawimawh thu sawiin sawrkar hnathawkte chu loneitute kaihruaitu an nih ngei a tul thu a sawi.

Nimin khan Conference Hall, Directorate of Agriculture & Farmers' Welfare-ah Agriculture & Farmers' Welfare Department hnuai scheme hrang hrang hmalakna thlirletna hun ‘Review Meeting’ neih a ni a. He hunah hian Pu PC Vanlalruata chuan department hnuai scheme tam tak neihte tihlawhtling tura rinawm leh thahnemngai taka mipuite tana thawk chhunzawm zel turin thawktute a chah a, scheme a hlawhtlin theih nan sawrkar hnathawkte chu kuthnathawktute kaihruaitu an nih a pawimawh thu a sawi a ni.

Minister chuan Mizoramah Green Revolution a thlen ve theih nan kalkhawmte chu tan la turin a chah a, hnathawhna ah rilru pek tam a pawimawh tih sawiin kuthnathawktute hmasawna chuan ram hmasawna a thlen thei tih a sawi a ni.



RAIN HAVOC

Tunhnai ni 3 chhunga ruahsur chuan Mizoram hmun hrang hrangah chhiatna a thlen a, hmun thenkhatah in chim awmin tui lian avanga chenna in chhuahsan an awm a, inkalpawhna kawng ping a awm nual bawk.

State Disaster Management & Rehabilitation Department sawi danin tunhnaia ni 3 chhung ruahsur chuan chhiatna a thlen nasa hle a, hmun rang hrangah kawng ping

awmin lei min a awm nual bawk a, lung tla avanga kawng thenfai ngai hmun thenkhatah a awm a, chhiatna thleng avanga nunna chan erawh an la awm lo a ni.

Sawrkhar hotute sawi danin Lunglei District chu ruahsur avanga chhiatna thlen nasat berna hmun a ni a, Khawthlangtuipui chim chin a san zel avangin Tlabung khaw chhunga chhungkaw 7-in an chenna in an chhuahsan. Tuilian vanga chenna in chhuahsante hi zirna in leh hmun remchang dangah an inthiar lut rih phawt a ni.

Khawthlangtuipui hian len lam a pan zel rih avangin tuipui kam hnaih deuha awm chhungkaw dang pawh inralring tura hriattir an ni a, Khawthlangtuipui hnar lamah pawh ruah a la sur zui zel rih avangin zanin lamah pawh tui chim chin hi sang chhunzawm zel thei dinhmunah a ding a ni.

Heng bakah hian Bualte dai (National Highway-54) lei min chuan kawng hnawh ping vekin, lei minna hmunah hian Excavator pahnihin ngawrh takin then fai hna an thawk reng chungin lei a la tlak belh zel avangin kawng hi tun dinhmunah a la tlang rih lo va. Lungleia kan Correspondent Thanghmingliana Renthlei sawi danin Lirthei tangkhang hi 100 chuang awmin zin mi tangkhang mi 300 dawn chu Bualte khawtlangin buatsaihin riahna tur an ngaihtuah sak bawk a ni.

Kan Correspondent Report ngaihthlak chhunzawm ang.
Voicecast

Aizawlah chuan vawiin atangin Kulikawn Ngaizel-a lung tla thenfai a nih dawn avangin Kulikawn - Saikhamakawn kawngpui khar a ni a, Aizawl Traffic SP Pu C. Vanlalvena'n hriattirna a tihchhuah danin K. Lalnghakliana Petrol Pump bula lung tla chu Aizawl District Disaster Management Authority ruahmana thenfai a nih dawn avangin hnathawh chhungKulikawn leh Saikhamakawn inkar kawngpui chu lirthei eng chi mah tlan tlang theih loha khar a ni.

Kawngpui khar a nih chhung hian Saikhamakawn lam atanga Kulikawn pan turte chu Hridaikawn lamah kalin, Pika road lamah tlan tur a ni a. Kulikawn lam atanga Saikhamakawn pan turte chu Tlangnuam lama kal tur a ni thung a, heng kawngpui pahni-ah hian MMV chin chunglam chu tlan phal a ni lo a ni.



PROJECT THAICHHAWNI NU

Hmeichhe naupang chawikan nana duan Project Thaichhawni Nu chu nimin khan Champhai ah tlangzarh a ni.

Women & Child Development, Social Welfare & Tribal Affairs Department buatsaih ‘Project Thaichhawni Nu’ hi nimin khan I&PR Auditorium-ah Champhai District Bawrhsap Pu Mohammad Aaquib chuan a tlangzarh a, zirlai naupangte tan a pawimawh zia sawiin Thaichhawni nu in a fanu tana a inpekna chuan nu te tan chona nasa tak a pek thu a sawi a, project kaltlangin hmeichhe naupangten hma hun duhawm tak an neih ngei a beisei thu a sawi a, hmeichhe naupang chauh ni lovin mipa naupang thleng pawhin naupangte an nih atanga pawisa khawlsak a pawimawh tih sawiin SSY hnuaia pawisa lo khawlsak hian zirna sang zawk an thlen hunah an tan hlu tak a ni tawh dawn tih a sawi a, kum 18 an nih atangin an lachhuak thei a, hei hian zirna kawnga harsatna tam tak an tawhna turah a veng dawn tih a sawi.

Project hming "Thaichhawni Nu" tih hi Mizo hla leh thawnthu lama Thaichhawni Nu hming atanga lak a ni a, he Project hian hmeichhe naupangte hmalam atan sum dahsak a, an zirna leh nupui pasal nei hnu mamawh atan sum awmsa siam te, BBBP programme angin hmeichhia naupangte chu sum dahna hmanga anmahni dinhmun tih chak zawk te, Nu leh pate rilru siamthat a, "fanu tan sum dah hi pawimawh a ni" tih hrehtir leh thla 10 chhungin kum 10 hnuailam hmeichhe naupang 4,050 te SSY scheme-ah luh tirtu chu a tum tlangpui a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MZP

Mizo Zirlai Pawl General Headquarters hruaitute chuan, Special Intensive Revision neih mek a Chakma khaw thenkhata voter pung tam lutuk chu, Central Young Chakma Association leh Mizoram Chakma Student Union-te nen a hmun a kal chilh a, a tul ang a hmalak an tum tih an sawi.

Nimina MZP General Headquarters Aizawl a thuthar thehdarh tute an kawmna-ah, MZP hruaitute chuan he thu hi sawiin, sorkar laipuiin a phut ang a Special Intensive Revision neih mekah, Chakma khaw thenkhat a voter punna chu a nasat lutuk thu leh hei hi thil rinhlelh awm tak a nih thu te, Document lem hmaga Voter ID hial siam an tam ni a thu an dawn thu te bakah Aadhar Card pawh a lem a siam thei an awm ni a an ngaih avangin fimkhur a ngai hle a ni, an ti a. A bik takin Red Zone leh Yellow Zone-a Election Officer, ARO leh AERO te chu fimkhur tura an duh thu leh, Chakma khaw 59 te chu uluk lehzuala en nawn an duh tih an sawi bawk.

MZP General Headquarters hruaitute chuan West Bengal-a Special Intensive Revision kalpuina-ah pawh, West Bengal huam chhunga Chakma awmte’n Mizoram document an neih nual thu leh heng document te hi enfiah tura Mizorama rawn thawn a awm nual niin an sawi bawk.

<><><>

CADC CEM SWEARING IN

BJP hruaitu hlun Pu Nirupam Chakma chu Chakma Autonomous District Council Chief Executive Member atan nimin khan rinawmna thutiam tira lakluh a ni.

Nimina Kamalanagar, Chawngte-a CADC Art & Culture Hall-a lakluh inkhawmah hian Lawngtlai Bawrhsap Pu Donny Lalruatsanga chuan BJP leh ZPM thawkdunin an thlan CEM Pu Nirupam Chakma hi thutiam a laktir a,

CEM thar Pu Nirupam Chakma chuan CADC-ah huapzo, langtlang leh mipui sawrkar din tura hmalak a nih tur thu te, hmasawna kawng hrang hrang- Zirna, Kawlphetha, kawngpui tha, thalaite tana hna thar siam leh a dangte ngaihpawimawh a nih tur thu a sawi bakah CADC hmasawna turin a kaihhruai sawrkarin theihtawp a chhuah tur thu intiamin, hemi kawngah hian thahnem ngai taka sawrkar tawiawm turin CADC huamchhunga VC, Tlawmngai Pawl, Kohhran leh mipuite a sawm nghal bawk.

Mizoram Sawrkar District Council & Minority Affairs Minister Pu C. Lalsawivunga pawhin rei tak Governor's Rule - a an awm hnua, CADC - ah sawrkar thar lakluh a ni chu lawmawm a tih thu a sawi a. Chakma Democratic Alliance Legislature Party chuan CADC tan hmasawna thar a thlen a beisei tlat tih a sawi.

CADC- ah hian Elected Seat - 20 awmin, Chakma Democratic Alliance Legislature Party-ah hian BJP-10 leh ZPM - 9, thawkhoin sawrkarna hi an siam a ni.

<><><>

PM Modi

Ram pathum tlawh tura zin chhuak Prime Minister Narendra Modia chuan hlawhtling taka Indonesia a tlawh hnuin nizan khan Australia khawpui Melbourne a thleng a. Melbourne ah hian Australia Minister for Housing, Minister for Homelessness leh Minister for Cities Clare O'Neill chuan alo hmuak a. Melbourne-a India mi cheng thahnem takin an lo lawm bawk a ni. A cham chhungin Prime Minister Modia hian Indiai-Australia Annual Summit vawi 3 naah a tel ang a. India-Australia CEO Forum ah a tel dawn bawk a. Sumdawng hotu kalkhawmte hmaah thu a sawi ang. Pu Modia chuan social media lamah Australia Prime Minister Anthony Albanese nena inkawmna hun tha tak an neih a beisei thu a sawi a ni.

PM Modia hian nimin khan UNESCO World Heritage Site Prambaman Temple a tlawh a. Indonesia President Prabowo Subianto chuan PM Modia hi a tawiawm a ni. Thuchhuah intawm an siamah President Prabowo chuan Prambanan temple chu India leh Indonesia inthianthatna kum 100 chuanga upa tawh entirtu a ni a ti. Prime Minister Modia pawhin vawiina Temple a tlawh thei chu atan thlarau lamah leh a nuna tawnhriat pawimawh tak anih thu a sawi a. Indonesia mipuite chu kum 120 chhung he temple him taka an vawng thei chu fakin ram pahnihten chanchin ropui an intawm thil anih thu a sawi a ni.

Prime Minister Modia hian Indonesia-a hun a hman hnu hian vawiin vek khan Australia khawpui Melbourne a pan a ni.

<><><>

EAM

External Affairs Minister Dr.S.Jaishankar chaun nimin khan Kuwait ram hruaitu Crown Prince Sheikh Sabah Al-Khaled Al-Sabah a kawm a. He hunah hian Pu Jaishankar-a Prime Minister Modia aiawhin Crown Prince hi duhsakna a hlan a. India leh Kuwait inlaichinna tihmasawn zel tura Crown Prince hmalaknaah lawmthu a hrilh bakw a ni.

External Affairs Minister hian Kuwait Prime Minister Sheikh Ahmad Abdullah Al-Ahmad Al-Sabah a kawm bawk a. India mi chengte hamthatna tur leh an hmasawnna tura theihtawp a chhuah avangin lawmthu a hrilh a. Dr.Jaishankara hian Kuwait Defence Minister Abdullah Ali Abdullah Al-Salem Al-Sabha a hmubawk a ni.

